

**Uunga siunnersuut:****Inatsisartut Suleriaasiata allangortinneqarnera**

(Immikkut ittumik ataatsimiittoqartillugu Inatsisartut ataatsimiinnerinut qarasaasiakkut peqataaneq)

**Saqqummiussissut  
(Inatsisartut Siulittaasuat)****Siullermeerneqarnera**

Siulittaasoqarfik sinnerlugu matumuuna Inatsisartut Suleriaasiata allangortinneqarnissaanut siunnersuut saqqummiutissavara.

Siunnersuut Inatsisartut ataatsimiinnerisa avataanni tuaviortumik ajornartoornermiluunniit inatsisiliornissaq pisariaqalersillugu Inatsisartut qarasaasiatigut ataatsimiissinnaalernissaat siunertaralugu Inatsisartut Naalakkersuisullu pillugit Inatsisartut inatsisaata allangortinneqarnissaanik Naalakkersuisut siunnersuutaannut atatillugu isigineqassaaq.

Inatsisartut Naalakkersuisullu pillugit Inatsisartut inatsisaata allangortinneqarnissaanut Naalakkersuisut siunnersuutaata akuersissutigineqarnerata malitsigisaanik Inatsisartut Suleriaasiata iluarsineqarnissaa pisariaqartilersussaavoq.

Tamannalu siunertaralugu siunnersuut manna saqqummiunneqarpoq.

Siunnersuutikkut Siulittaasoqarfik piginnaatinneqarpoq suliassamik kinguartinneqarsinnaanngitsumik suliarinninniarlutik Inatsisartut immikkut ittumik ataatsimiissatillugit ataatsimiinnerup videukkut nalunaarasuartaatitigulluunniit attaveqaatitigut ataatsimiinnertut, imaluunniit najuulluni aamma videukkut nalunaarasuartaatitigulluunniit attaveqaatitigut ataqatigiissillugit ataatsimiinnertut ingerlanneqarnissaa aalajangissallugu.

Siunnersuutikkut taamatuttaaq ataatsimiinneq videukkut nalunaarasuartaatitigulluunniit attaveqaatitigut ataatsimiinnertut, imaluunniit najuulluni aamma videukkut nalunaarasuartaatitigulluunniit attaveqaatitigut ataqatigiissillugit ataatsimiinnertut ingerlanneqassatillugu taasisarnerit qanoq ingerlanneqartarnissaat pillugu aalajangiinissamut Siulittaasoqarfik piginnaatinneqarpoq.

Siunnersuutip malitsigissavaattaaq ilaasortat Inatsisartut oqaluttarfianniit imaluunniit (malitsigisaanik oqaaseqaatit malitsigisaanillu apeqquteqaatit eqqarsaatigalugit) oqaluttup issiavianit oqaaseqartarnissaanik suleriaatsimi aalajangersakkat sanioqqunneqarsinnaassammata, ilaasortat najuutinngikkaluarlutik ataatsimiinnertut taamaattunut peqataasut eqqarsaatigalugit.

Siunnersuummut itisiliinerunissamut inatsimmut nassuiaatit innersuunneqarput.

Siunnersuut pillugu ilaasortat oqalliluarnissaannik Siulittaasoqarfik kissaassivoq.